

Formando Tatanan pa Futuro

Hopi mama ta eduká nan yu muhé pa bira un hende responsabel. Fo'i chikitu e ta laba tayó, bari, mòp, stòf, laba paña, èts. Mi ta kòrda admirá un hobensita ku ainda tabata na skol básiko trahando duru. E no solamente a hasi su trabou bon, ma e tambe a traha su so, sin ku su mama mester a keda papia.

En kontraste, hopi mayor ta laga e lidernan maskulino di mañan pa nan kuenta. **Fo'i chikitu, e ta hasi solamente loke e tin smak di hasi.** Nan no ta siñ'é ta responsabel. Chapi yerba den kurá? Esei ta trabou muchu pisá; e ta kapas pa krea blar! Laba tayó? Ami hasi trabou di hende muhé? Piki paña den su kamber? No por! Ta p'esei e tin mama tòg! I kiko di skol? HAVO, VWO...sigui studia? Pakiko kibra kabes tantu asina? Ta muchu mas fásil pa bishitá LTS di bes en kuando, te ora ta fada òf kaba...

Di e forma aki, nos ta siña nan pa no kansa kurpa pa logra siertu meta, pa no pèrsistí te kaba, pa ser irresponsabel. Nos no ta urgi nan pa sigui studia pa nan por haña un bon trabou pa nan por sòru pa nan esposa i yunan. Nos ta eduká nan pa pensa di nan mes so, buskando nan propio interes egoísta. **I lagando yunan hòmber haña nan gana, nos ta siña nan ta mal trahadó, mal suidadano, mal bisña, mal tata, mal esposo, i mal lider.**

Nos ta enkurashá nan pa sali ku amigunan, sinta pornada riba kaya, dibertí, fiesta, kore kaya. Ora e ta keda kas, su mayornan mes ta bis'é “no hasi kos di hende muhé”. Nos ta siñ'é ku kas ta lugá pa hende hòmber “tènk”: kome, sali; bin kas, baña, kome, sali; bin kas, drumi, kome, sali...

Ma ta ken di ku un hende hòmber no mester yuda na kas? Ta ken di ku hende muhé so mester laba tayó, bari, piki paña? Esei ta nos mes idea absurdo. Esei no ta den Beibel! Echu ta ku un hòmber ku ta yuda na kas, ta demonstrá apresio pa su esposa.

Beibel ta bisa bon kla, “*Esposonan, stima boso esposanan ...*” (Kolosensenan 3:19). Yònkumannan ta papia bunita di nan amor pa un yùfrou. Ma di bèrdad, nan tin ningun klase di idea kiko stimashon bèrdadero ta. Nan sa solamente di buska nan propio interes. **Bisá bòt, hopi yònkuman ke un muhé den nan kas pa tres motibu: pa sèks, haña yu, i komo un kriá!** Fuera di esei, nan tin e muhé pa nada. Kompañerismo? Nan ta haña esei serka nan amigunan. Komunikashon? Esei ta bai bon, solamente si e muhé ta tende di e hòmber.

Esei ta fundeshi pa un matrimonio felis? Nò! Un bon matrimonio ta rekerí tempu huntu, komunikando ku otro. Na nos islanan, hopi matrimonio ta krekeché **pasobra** e hòmber ta sali tur ora...no tin komunikashon. Komo resultado, ora e kabayero ta na kas, e señora, desesperá pa kompañerismo i komunikashon, ta papia bai gol, kansando e hòmber asina tantu ku e mener ta buska salimentu atrobe.

Ta tempu pa mayornan—tatanan en partikular—lamta fo'i soño i tuma nan responsabilidat pa formashon di e yu hòmber na serio. Ta tempu pa tatanan duna bon ehèmpel, stòp di sali asina tantu i **dediká atenshon pa siña e yu hòmber tuma responsabilidat manera hòmber.** Ta tempu pa motiv'é pa sigui studia, pa traha duru, pa trata otro hende korekto (etiketa), pa kuida pertenensia di nan mes i otronan, hiba un bida moral, èts.

Skritura ta bisa: “*Esun ku engendrá un bobo ta engendr'é pa su mes tristesa, i tata di un bobo no tin goso. Un yu bobo ta tristesa pa su tata, i amargura pa esun ku a pon'é na mundu*” (Proverbionan 17:21,25). Un “bobo” den e konteksto aki ta un persona ku ta étikamente ignorante i irresponsabel.

Nos ta riba kaminda ku ta guia na hopi tristesa pa mayornan. Nos tin ku lamta fo'i soño i kuminsá hasi máksimo esfuerso pa forma tatanan eksitoso pa futuro.